

**Suliffeqarfiit nutaat aallarnisaasut akileraartarnikkut qanoq oqinnerusumik qanorlu pisortaniit ikorfartorneqarsinnaanerit pillugu apeqquteqaat aallaavigalugu Inatsisartunut oqallisissiasatut siunnersuut**

(Inatsisartunut ilaasortaq Peter Olsen, Inuit Ataqtigiit)

**Akissuteqaat**

(Aningaasaqarnermut Akileraartarnermullu Naalakkersuisoq)

Suliffeqarfinnik nutaanik aallartitsinissap siuarsarneqarnissa pingaaruteqarmat Naalakkersuisut siunnersuuteqartoq isumaqatigaat. Tamatuma peqatigisaanik aallarnisaasut pitsaasumik atugassaqartinneqarnissaanni akileraartarneq kisimikapeqqutaanngitsoq aammali aningaasalersuinissamut periarfissat, siunnersorneqarneq, tapiissutinut aqqissuussinerit, inatsisit kiisalu aningaasatigut piumasaqaatit digitalinngorsaanerlu pingaaruteqartut Naalakkersuisut isumaqarput.

Taamaattumillu aallarnisaasunut pitsaasunik qanoq atugassaqartitsinnaanitta, tassungalu ilanngullugu ingerlatseqatigiiffinnut suliffeqarfinnullu aallarterlaanut akileraarutitigut maleruaqqusat oqallisiginissaat Naalakkersuisunit aamma ammaffigineqarpoq.

Piffissaq aallarnisarfiusoq annertuumik aningaasartuuteqarfiugajuppoq, taamaattumillu suliffeqarfiup ukiuni siullerni marlunni pingasuniluunniit sinneqartooruteqarnissaa naatsorsuutigineqartariaqanngilaq. Akileraarutitigut maleruaqqusani maanna atuuttuni tamanna eqqumaffiginiarneqarpoq ukiuni tallimani atuuttussanngorlugu amigartoorutitik nuussisinnaatitsinikkut kiisalu ullormit siullermit nalikilliliinissamut periarfissiinikkut. Tamannalu suliffeqarfiit ingerlatseqatigiiffillu ajunngivissumik iluaqutigisarpaat.

Suliffeqarfiit nutaat kissaatigineqartutut annertussusilimmik pilersinneqartarneranni akileraartarnikkut malittarisassat iluaqutaasimanersut sukkulluunniit isumaliutigineqarsinnaavoq. Taamaattorli pingaaruteqarpoq oqaatigissallugu akileraartitsisarnerup suliassai pingaarnerit tassaammata akileraarutitik akitsuutinillu akileeqqusisarneq. Tapiissutit inuussutissarsiutinillu siuarsaanermi suliniutit sapinngisamik annertunerpaamik ersarissumik ingeralanneqassapput, aningaasanut inatsisit aqutugalugit imaluunniit inuussutissarsiutinik siuarsaaniarnermi inatsisit aqutugalugit.

Ataatsimut isigalugu aallarnisaasut nutaat akimmiffigisagaasa annerpaat ilaat tassaavoq isumassarsiaminnut aningaasalersuutissanik nassaarniarneq. Inuussutissarsiutit siuarsarnissaanut aqqissuussinerit arlallit pioreerputm ilaatigut Greenland Venturep ataani. Tamatuma saniatigut aallarnisaasartunut immikkut ittumik tapiissutissat Greenland Businessip neqeroorutigai. Ilaatigut aallarnisaasartunut immikkut najoqqutassaq suliarineqarsimavoq.

Annikitsukkuutaanik taarsigassarsitsisarneq pillugu Naalackersuisunit siunnersuut Inatsisartut ataatsimiinnerani matumani Inatsisartunit immikkut saniatigut oqaluuserineqarpoq, tamatumani pineqarluni aallarnisaasunut nutaaliorniartut isumassarsiaminnik aallartitsinissaannut aningaasanik taarsigassarsitsinissamut sulit allanik periarfissiisumik inatsimmik allannguissaq.

Ingerlatseqatigiiffiit pillugit inatsimmi maleruaqqusat nutaat ulloq 1. januar 2018-imi atuutilissapput, taakku nassatarisaannik aallarnisaasut ingerlatseqatigiiffimmik taaneqartumik inerlatsinissamut periarfissiissallutik. Ingerlatseqatigiiffimmik taama ingerlatseriaatsimi aningaasaatigut piimasaqaat taamaallaat 1 kr.-iuvoq aammalu piginneqatigiilluni ingerlatseqatigiiffinnut aktiaateqarlunilu ingerlatseqatigiiffinnut assingusumik killilimmik pisussaaffilerneqassallutik.

Aallarnisaasunut siunissami atugassarititaasussat pillugit oqalleqqinnissami Naalackersuisut peqataarusupput. Taamaattorli aallarnisaasut, inuussutissarsiornikkut kattuffiit il.il. Unammilligassarisaminnik nassuiaateqarnissaat pingaaruteqarpoq. Inuussutissarsiornikkut kattuffiit soqutigisaqaqatigiiffiilluunniit allat unammilligassanik taakkunungalu aaqqiissutaasinnaasunik misissuisussanik suleqatigiissitaliornissaq assigiisaanilluunniit pilersitsinissaq sulissutigissagaat Naalackersuisunit assut kissaatigineqarpoq. Taamaattoqassappat qitiusumik allaffeqarfimmi atorfilittat suliami tamatumani peqataatinneqarnissaat tulluartuussaq.

Tamakku tunngavigalugit Naalackersuisut siunnersuut Inatsisartunut oqaluuserisassanngortippaat.